

“Taim God i makim i kamap pinis, na Kingdom
bilong God i kam klostu.

Yupela tanim bel na bilipim dispela gutnius.”

Mak 1:15

“Tasol nau, (God) Em i tok strong long olgeta
man long olgeta hap bilong dispela graun
olsem, ‘Yupela i mas tanim bel.’”

Aposel 17:30

“Em olsem na, yupela tanim bel na kam bek
gen long God, na Em bai rausim olgeta sin
bilong yupela.”

Aposel 3:19

Yumi kisim sampela save pinis.

Gutnius bilong God i ples klia. God i no inap kisim bek sin manmeri long feitful wok bilong ol yet o long misin wok bilong ol o long ol gutpela pasin bilong ol. Nogat. God i save kisim bek sin manmeri long feitful wok bilong Jisas long diwai kros tasol.

Ating yu kisim sampela save pinis long dispela samting, tasol dispela i no minim olsem yu bin tanim bel, na yu bilipim na trastim ol dispela wok bilong God.

- ▶ **Yu save pinis olsem, Jisas i wokim olgeta samting na Em i bos na oana bilong olgeta samting na Em i bos na oana bilong yu. Olsem na, long dispela as yu mas i stap aninit long Jisas.**

“Krais i bin wokim olgeta samting. Em i bin wokim olgeta samting long heven na long graun. Em i bin wokim olgeta samting yumi inap lukim na olgeta samting yumi no inap lukim. Em i bin kamapim olgeta king na olgeta kantri king i save bosim, na Em i kamapim olgeta gavman, na olgeta bikman, na olgeta man i gat wok bilong bosim ol samting. Em i bin wokim olgeta samting na olgeta samting em bilong Em yet. Krais i stap paslain long olgeta samting na olgeta samting i save stap inap long strong bilong Krais tasol.” **Kolosi 1:16-17.**

- ▶ **Na yumi save olsem, yumi no stap tumas aninit long Jisas. Nogat. Yumi bin givim baksait long Jisas.**

“...Olgeta manmeri ol i bin givim baksait long God, olsem na, olgeta i kamap manmeri nogut....” **Rom 3:9-12.**

Tasol.....

- ▶ **God i bin transferim sin bilong ol lain bilong Em i go long Jisas na Em i kotim Jisas long sin bilong ol.**

“God i bin salim Krais Jisas i kam, na Krais Jisas i kisim pe bilong sin na Em i dai, na blut bilong Em i kapsait bilong tekewe bel hat bilong God long sin bilong manmeri i bilipim na trastim Krais Jisas.” **Rom 3:25.**

“Krais yet i no save liklik long sin. Tasol, bilong helpim yumi, God i mekim Em i kamap sin samting. God i mekim olsem bai yumi, long wok bilong Krais, i ken i kamap stretpela manmeri bilong God.” **2 Korin 5:21.**

- ▶ **Na tu, God i transferim stretpela pasin bilong Jisas i go long ol lain bilong Em na long dispela wei God i kolim ol “stretpela manmeri”.**

“Ol i manmeri bilong mekim sin, na ol i kamap sot long glori bilong God. Na God i ken i kolim ol “stretpela man” long wok Krais Jisas i bin mekim bilong baim bek manmeri. Dispela em i presen bilong God, na i kam long rot bilong grasias bilong God.” **Rom 3:23-24.**

- ▶ **Jisas i katim olgeta narapela rot na Em i makim Em yet Em i rot bilong sin manmeri i ken i go long ples bilong God. Jisas wanpela Em i rot na i no gat narapela rot.**

“Mi yet Mi rot, na Mi as bilong Tok i tru, na Mi as bilong laip. I no gat wanpela man inap i go long Papa long narapela rot. Nogat. Long Mi tasol.” Jon 14:6.

Mi tok pinis, yu save pinis long Jisas, na yu save pinis long olgeta wok God i bin mekim long dai bilong Jisas long diwai kros.

Yu bin kisim save, tasol dispela i no minim olsem yu bin tanim bel, na yu bilipim na trastim ol dispela wok bilong God long feifful wok bilong Jisas.

Save i no olsem tanim bel na bilipim na trastim na bihainim Jisas. Nogat. Save em i save tasol. Save em i samting bilong het na tingting bilong manmeri. Save em i samting yu kisim na yu tingim, “Em nau mi klia long dispela samting.”

Em olsem na, yu bin kisim save, tasol dispela i no minim olsem yu bin tanim bel. Em i gutpela yupela i kisim save. Tasol, nau yu mas tanim bel na bilip. God i tok, “Yu mas tanim bel.”

Tanim bel em i wanem samting?

Tanim bel i olsem yu givim baksait long wei bilong yu na yu tanim na yu kam long wei bilong God. Tanim bel i olsem yu senisim tingting bilong yu na yu lusim laik bilong yu na yu bihainim laik bilong God. Tanim bel i olsem yu lusim dispela rot nau yu stap long em na yu tanim na kam long rot bilong God.

Mi wokim 3-pela liklik piksa wantaim liklik tok bilong helpim yu skelim laip bilong yu yet.

Yu no tanim bel.

Yu wokabaut long wei bilong yu yet.




Em olsem na, yu givim baksait long God.

Sapos yu no tanim bel na yu stap yet long bihainim laik bilong yu, orait bel hat bilong God i stap yet long yu na bihain yu bai kisim hel.

**Yu gat save long ol samting bilong Jisas,
tasol yu no tanim bel.**

Yu wokabaut yet long wei bilong yu.
Yu lukim na yu klia long ol samting
bilong Jisas, tasol yu no tanim bel.
Dispela i olsem yu lukluk tasol
long olgeta samting bilong Jisas.



Em olsem na, yu givim baksait
long God.

Sapos yu lukluk tasol, orait yu no tanim bel. Sapos yu gat bikpela save long olgeta samting long dai bilong Jisas, tasol yu no tanim bel, orait bel hat bilong God i stap yet long yu na bihain yu bai kisim hel.

Yu tanim bel.

Yu givim baksait long wei
bilong yu.



⇒ Yu kam nau long wei bilong God na
yu wokabaut long wei bilong God.

Sapos yu tanim bel na givim baksait long wei bilong yu na yu tanim na kam long wei bilong God na yu bilipim na trastim ol dispela wok God i mekim long dai bilong Jisas na yu bihainim Em, orait bai God i fogivim yu na givim laip long yu.

“Man i bilip long Pikinini, em i gat laip i stap gut oltaim oltaim. Man i no bihainim tok bilong Pikinini, em i no inap kisim laip. Nogat. Bel hat bilong God i stap yet long em.” Jon 3:36.

Nau yu mas wokim disisen. Yu bai stap long save bilong yu tasol na lukluk tasol long olgeta samting God i mekim long dai bilong Jisas, a? O bai yu tanim bel na bihainim Jisas na stap aninit long Em, a?

**Mi tokim yupela,
Nau em i taim we God i ken i bel isi long yupela.
Nau em i taim bilong yu tanim bel na kam bek long God
na stap aninit long Em na kisim laip.**

Ol wanwan Baibel ves

“Yumi klia olsem sin i karamapim yumi olgeta, yumi ol lain Juda na ol lain Jentail wantaim. Dispela kain tok i stap pinis long Buk bilong God, na i tok, ‘I no gat wanpela manmeri i stretpela, nogat tru. I no gat wanpela manmeri i gat gutpela tingting, na i no gat wanpela manmeri i save bihainim God. Olgeta manmeri ol i bin givim baksait long God, olsem na, olgeta i kamap manmeri nogut. I no gat wanpela manmeri i save mekim gutpela pasin. Tru, i no gat wanpela.’” Rom 3:9-12.

“Pe bilong sin em i dai.” Rom 6:23.

“(God) Em i bel hat long ol pasin we ol manmeri i save givim baksait long Em, na Em i bel hat long ol pasin nogut bilong ol.” Rom 1:18.

“Em (Jisas) i no bin mekim sin, na wanpela tok giaman i no bin kamap long maus bilong Em.” 1 Pita 2:22.

“Krais yet i hangamap long diwai kros na Em i karim sin bilong yumi long bodi bilong Em. Em i mekim olsem bai yumi lusim wei bilong sin na yumi bihainim wei bilong stretpela pasin. Em i bin kisim bagarap bilong oraitim yumi.” 1 Pita 2:24.

“Krais yet i no save liklik long sin. Tasol, bilong helpim yumi, God i mekim Em i kamap sin samting. God i mekim olsem bai yumi, long wok bilong Krais, i ken i kamap stretpela manmeri bilong God.” 2 Korin 5:21.

“Olgeta manmeri ol i wankain tasol. Ol i manmeri bilong mekim sin, na ol i kamap sot long glori bilong God. Na God i ken i kolim ol “stretpela man” long wok Krais Jisas i bin mekim bilong baim bek manmeri. Dispela em i presen bilong God, na i kam long rot bilong grasia bilong God. God i bin salim Krais Jisas i kam, na Krais Jisas i kisim pe bilong sin na Em i dai, na blut bilong Em i kapsait bilong tekewe bel hat bilong God long sin bilong manmeri i bilipim na trastim Krais Jisas.” Rom 3:23-25.

“Mi yet Mi rot, na Mi as bilong Tok i tru, na Mi as bilong laip. I no gat wanpela man inap i go long Papa long narapela rot. Nogat. Long Mi tasol.” Jon 14:6.

“Tasol nau, Em (God) i tok strong long olgeta man long olgeta hap bilong dispela graun olsem, “Yupela i mas tanim bel.” Long wanem? Em i bin makim wanpela

*de we Em bai kotim olgeta manmeri. Em bai mekim olsem long stretpela pasin bilong Em. Na Em i makim wanpela man na Em bai i stap jas long dispela kot. Na taim God i kirapim dispela man long matmat Em i soim olgeta manmeri dispela i tru tumas.” **Aposel 17:30-31.***

*“Man i bilip long Pikinini, em i gat laip i stap gut oltaim oltaim. Man i no bihainim tok bilong Pikinini, em i no inap kisim laip. Nogat. Bel hat bilong God i stap long Em.” **Jon 3:36.***

*“Tru tumas, Mi tokim yupela: Man i harim tok bilong Mi, na i bilip long God i bin salim Mi i kam, em i gat laip i stap gut oltaim oltaim. Em bai i no gat kot. Nogat. Em i lusim sait bilong i dai na em i kamap insait long laip pinis.” **Jon 5:24.***